

# , Memilih kerajaan: Rakyat yang akan menentukan – PM

UM 1 JUN 1990

KUALA LUMPUR 10 Jun — Perdana Menteri berkata, terpulanglah kepada rakyat sama ada memilih kerajaan Barisan Nasional yang ada sekarang ataupun kerajaan baru yang barisan pemimpinnya sering 'melompat-lompat' ibarat katak dan belalang.

Katanya, rakyat tidak seharusnya memarahi mana-mana pihak sekiranya mereka terpilih pemimpin yang tidak berpendirian tetap itu.

"Kita jangan marah nanti kalau kita punyai kerajaan yang tidak tentu arah... yang mempunyai mentaliti belalang. Picit sekali lepas ke sana dan picit sekali lagi lepas ke sini pula," katanya kepada para pemberita ketika ditanya mengenai usaha Parti Rakyat Sabah (PRS) mahu mengadakan kerjasama dengan Semangat 46 untuk menghadapi pilihanraya negeri di Sabah.

Bagaimanapun, katanya, beliau yakin rakyat tidak akan memilih corak pimpinan ibarat katak dan belalang itu.

Beliau ditemui selepas mengadakan pertemuan dengan ahli-ahli Parlimen Barisan Nasional di Bangunan Parlimen di sini hari ini.

Baru-baru ini, Presiden PRS, Dato' Dr. James Ongkili dilaporkan berkata partinya telah mengadakan pertemuan dengan Semangat 46 untuk menjalinkan kerjasama tersebut.

"Itu hak dialah (Datuk Dr. James). Kita ini dalam negara bebas. Siapa nak buat pendirian, buatlah. Yang penting ialah rakyat akan menentukan nasib mereka," katanya.

Beliau menarik perhatian bahawa kerajaan yang ada berpendirian tegas membangunkan negara dan rakyat sejak merdeka lagi dan akan meneruskan dasar-dasar tersebut pada masa akan datang.

Katanya, dengan dasar tersebut, Malaysia muncul sebagai negara yang berjaya di kalangan negara-negara sedang membangun.

Menurutnya, walaupun perpaduan kaum belum tercapai seratus peratus, namun rusuhan kaum tidak terjadi seperti di negara-negara lain kerana kestabilan politik dan ekonominya